

POESIA

Dopu avèti tantu aspettatu
Dopu avèti tantu guardatu
Dopu avèti tantu suniatu
T'aghju scupertu, nuda
Porga cumé u raggiu di sole
Quellu chi anagua u to visu ogni mattina.
Sana cumé u to pensementu,
Quellu chi face di tè, un esse.

Petru ALBERTINI

"STONDA"

A' mezu à un fogliu di silenziu
L'inchjostru s'hè calatu
Quand'u sole ammutulitu s'affaccia
E' di turchinu diventa sognu lu celu
Fora di a priggiò à u vetru troppu chjaru
Quandu à la funtana sciolti i bianchi capelli
Ciottanu duie zitelle e so bracce pasirgate
Affaccendate à lu purtellu di li so neri sogni.

Michela Curina BARTOLINI

"CIMITERIU"

C'è in Lisbona un cimiteriu
cusì dettu d'i Piaceri.
Ci ógliu andà, stiftitu e seriu,
e interracci morti veri.

Ci ógliu pone 'e miò speranze
di zitellu e d'omu fattu,
'e to' rabbie, 'e to' lagnanze,
i t'amori, ó core mattu.

In terra definitiva
i so' resti - chi bellezza! -
diceranu: "Ó Morte, eviva!
Facci dorme in cuntentezza."

Basta chi, pocu catani
fora di u so' rustulicciu,
elli ùn scopranu l'arcani
e si sfòghinu a capricciu.

Sentiteli: "Quanta strada
èmu fattu cun ssu scemu!
Or lasciate ch'ellu vada:
a limbu ci truveremu."

Crede di firmà padrone,
senza voglie nè bisognu.
Un sa ciò ch'ind'u saccone
l' avenzò, senza più sogni:

realtà senza culore,
prosa asciutta e, ciò ch'è pègghiu,
duv'ell'era u dolce amore,
amarure e stumachéghiu...."

Ó morti, ó morti, chi straziu!
Ète propiu un core neru.
S'ellu é questu lu ringraziu,
ùn v'interru più di veru.

* A scrittura hè
quella di l'autore.